

## **MBAZE UMUBYEYI IKIRUTA IMBYEYI**

MUPENZI VENUSTE.

Mbaze umubyeyi ikiruta imbyeyi  
Mubaze igituma adashira intimba  
Kandi yarategewe agatimba  
Akitakumbana n' abatambyi  
Ngafata umwanya nkanamutaka  
N' abe bose bamushagaye  
Mu mishayayo n' imihimirizo.

Mbaze umubyeyi ikiruta imbyeyi  
Mubaze impamvu adakoma yombi  
Akavuzza impundu nta mpuhwe mu nda  
Akarera asumbwa na nyina w' undi.

Mbaze umubyeyi ikiruta imbyeyi  
Mubaze impamvu aragira zona  
Mukome akamo azihe injishi  
Mubaze impamvu aseka ajijisha  
Nk' uhishe mu nda ishavu rishaje  
Boshye ushaka gushira azimura  
Agasaza asize iribi imusozi.

Nguhe iki ukunda amahoro ahinde  
Ngo ubibe imbuto itarimo nkongwa  
Kandi uhunike ahataba imungu  
Isuka y' impuha uyime umubyizi  
Uragire abawe utavangura  
Maze iyi nganzo nyihake umwezi  
Mbone ngutake utagira umwera  
Nguhunde imivugo itavuguruzwa?

Ni iki kiruta ubushyo bw' Inyambo  
Ndetse na Gitare naguterekeye  
Bihogo ubwayo yaje n' ibyansi  
Nguha amagaju arenga amagana  
Nguha iz' imisengo ndanagusenga  
Ukabaya gusonza uranansonga  
Umbuza kugera no ku isonga  
Bucya usizora uranansenya.

Nzane se akanyana gato muri izo  
Ndagiye hirya kakirya ivata  
Ko uragashima kuruta izindi

Ko n' ubugondo utabukunze?  
Cyangwa nziture Bangaheza  
Niba ikubuza guta ibiheko  
Ndavuga impfizi yo kuzishorera?

Mbese Sine ntiyagusekeye  
Iri n' izihaka ndetse n' izikamwa  
Yaje iherekejwe n' ibisabo  
Ngo amata agwire bibe karande  
Ni kuki utanyifuriye kuramba  
Nk' aho wakamye zitangishira?

Mbe ko zishira nguhe ibiziriko  
N' isaso yazo ubone ususuruke  
Hato utaziroha mu rusuma  
Ugasiga imitima isobetse amaganya?

Nguhe se Inkungu urashira intimba  
Hari icyo izahuraho ubukungu  
Ngo ugire urwuri rwo kuziragira  
N' abashumba bo kuzicunga  
Bo uzababonera Indabukirano  
Zireke kona nta we uzikoma  
Ntizice imbusane inzira y' ishora  
Kandi zigane imbuga isukuye  
Zanashituweho ibirondwe?

Ko nasobanuje undi mubyeyi  
Ndavuga data w' ingeso nziza  
Wantumye atandoha na gatoya  
Ngo nziguture zigutaramire  
Igituma iwawe nta ngororano  
Ni uko wabuze ingoro izikwiye?

Reka muhe karame uwo mubyeyi  
Yari yampaye ubwe bushishozi  
Yasomye kera mu ' Nderabarezi'  
Ati " urushako si umushongi "  
Ibyo ndabyanga ngo ampishe byinshi

Nsimbagurika ngana i Gikondo  
Nsanga iwawe batoba akondo  
Mbona uburanga mbuha urukundo  
Ntazi ko bugicira urukondo  
Nanjye ngo buzibuka iyo neza  
Tubone kwivuna urya mubyeyi.

Bumaze gutamira ku biza  
Buti " mfite data ukeneye izikamwa " .

Mba mfashe inoti n' iz' imisago  
Zigura ingweba zikamwa menshi  
Za kijyambere z' ibuzungu  
Ndazigutura intugu ziraruha  
Nazo uraziheba umbuza gutura  
Inzigo uranga uyigira ndende  
Ifata mu nda ihagira indaro.

I Kawangwari ni ho nabanje  
ARAP MOYI ari we uhatwara  
Narahatanze ay' amadolari  
N' amahero yo kuguhonga.

Muri Yuganda kwa MUSEVENI  
Mukono na Kampala kapitali  
Aho nahatanze magana urwiri  
Ngo udahonda intozi ukabura isheja  
Umaze kugwiza uti " kare Sebo " .

Mbe mubyeyi nguhe iki kindi  
Ngo ugane irembo udaca amarenga  
Ukamirwe imbyeyi ubagare ahera  
Usome ayera ucire amahoro  
Maze amahano tuyaha inkota  
Kandi uncungure utancuza  
Ngo ucinye akadiho ubona bicika?

Ko naguhaye imirima n' ababibi  
Bazi imirimo igenerwa amasuka  
Ngo ubone ugwize umusaruro  
W' imbuto yera amasaka meza  
Wabuze imivure itagira imivumo  
Ngo uhishe inturire untumire ntarama?

Insina wenga sinayivumbye  
Nta mutsama wo kunywa abatoni  
Nta n' inkangaza y' abahanzi  
Nta busetura bw' intwari  
Nta kagage aka k' abahetsi  
Nta gasururu k' abasya urukoma  
Kereka inzika ibuza amasano.

Ko nakubonye irya mu kabande  
Nkikubakuba nkaguha akaboko  
Ngo ugere ku isonga iyo mu mpinga  
Ni gute utangiriye akabanga  
Nararushye akuya ngo uhashyikire  
Aho guhoroza nk' umuhuza  
Ugahatana untobera amazi?

Mbese nzagushyire mu mutaka  
Niba ubutaka bugukirigita  
Maze ngutambagize ikirere  
Bwo uzagaruka usubiye ku isi  
Umenye gusaza utanduranyije  
Maze untaramire utantamaza?

Cyo reka kwisama nk' incike  
Maze utuze nkurage incuke  
Ucire umutima utera imbusane  
Imbuta idutanya uyime ibigega.

MUPENZI VENUSTE

" Igitonyanga cy' urukundo gitera icyizere cy' ubuzima".

---